

ВОСКРЕСНА СЛУЖБА 7 ГЛАСА

В СУББОТУ НА ВЕЛИЦЕЙ ВЕЧЕРНИ

На Господи, воззвах, поставим стихов 10, и поем стихиры воскресны осмогласника, 3: и Анатолиевы, 4: и минеи 3, или 4, или 6, аще празднуется святой. Слава, минеи, и ныне, Богородичен первый, гласа.

Стих: Изведи из темницы душу мою, * исповедатися Имене Твоему.

Приидите, возрадуемся Господеви, / сокрушившему смерти державу, / и просветившему человеческий род, / со безплотными зовущие: / Содетелю и Спасе наш, слава Тебе.

Стих: Мене ждут праведницы, * дондеже воздаси мне.

Крест претерпел еси, Спасе, / и погребение нас ради, / смертью же яко Бог смерть умертвил еси, / темже покланяемся / тридневному воскресению Твоему: / Господи, слава Тебе.

Стих: Из глубины воззвах к Тебе, Господи, * Господи, услыши глас мой.

Апостоли видевше воскресение Содетеля, / чудяхуся, поюще хвалу Ангельскую: / сия слава есть церковная, / сие богатство Царствия: / пострадавший нас ради, Господи, слава Тебе.

Ины стихиры, Анатолиевы, глас тойже:

Стих: Да будут уши Твои внимлюще * гласу моления моего.

Аще и ят был еси, Христе, / от беззаконных мужей, / но Ты ми еси Бог, и не постыжуся, / биен был еси по плещема, / не отметаюся, на кресте пригвожден был еси, / и не таю: / востанием твоим хвалюся: / смерть бо Твоя живот мой, / Всесильне и Человеколюбче Господи, слава Тебе.

Стих: Аще беззакония назириши, Господи, Господи, кто постоит; * яко у Тебе очищение есть.

Давидское пророчество исполняя Христос, / величие Свое в Сионе учеником открыл есть, / хвалима показуя Себе, / и славима присно со Отцем же и Духом Святым: / первее убо безплотна, яко Слова, / последи же нас ради воплощена, / и умерщвлена яко человека, / и воскресша со властью, яко Человеколюбца.

Стих: Имене ради Твоего потерпех Тя, Господи, потерпе душа моя в слово Твое, * упова душа моя на Господа.

Сошел еси во ад, Христе, / якоже восхотел еси: / испровергл еси смерть, яко Бог и Владыка: / и воскресл еси тридневен, / совоскресив Адама от адových уз и тления, / зовуща и глаголюща: / слава Воскресению Твоему, Едине Человеколюбче.

Стих: От стражи утренняя до ночи, от стражи утренняя, * да уповаеи Израиль на Господа.

Во гробе положен был еси / яко спя Господи: / и воскресл еси тридневен, / яко силен в крепости, / совоскресив Адама от тли смертных, / яко Всесилен.

Таже минеи стихиры святому.

Слава святому, аще имать.

Аще ли ни, Слава, и ныне, Богородичен.

Мати убо позналася еси, / паче естества, Богородице, / пребыла же еси Дева, паче слова и разума: / и чудесе Рождества Твоего сказати язык не может. / Преславу бо сущу зачатую, Чистая, / непостижим есть образ рождения: / идеже бо хочет Бог побеждается естества чин. / Темже Тя вси, Матерь Божию ведуще / молим ти ся прилежно, / моли спастися душам нашим.

Таже вход с кадилом. Свете Тихий: Прокимен и ектении.

На стиховне стихиры воскресны, глас 7:

Воскресл еси из гроба Спасе мiра, / и совоздвигл еси человеки с плотию Твоею: / Господи, слава Тебе.

Ины стихиры, по алфавиту:

Стих: Господь воцарися * в лепоту облечеса.

Воскресшему из мертвых и просветившему вся, / приидите, поклонимся: / от адова бо мучительства нас свободил есть, / своим тридневным Воскресением / живот нам даровавый, / и велию милость.

Стих: Ибо утверди вселенную * яже не подвижится.

Во ад сошед Христе, смерть пленил еси, / и тридневен воскрес, нас совоскресил еси, / славящих Твое всесильное востание, / Господи Человеколюбче.

Стих: Дому Твоему подобает святыня * Господи, в долготу дней.

Страшен явился еси, Господи, / во гробе лежа яко спя, / воскрес же тридневен яко силен, / Адама совоскресил еси зовуща: / слава Воскресению Твоему, / Едине Человеколюбче.

Слава, и ныне, Богородичен:

Под кров Твой Владычице, / вси земнороднии прибегающе, вопием ти: / Богородице Упование наше, / избави нас от безмерных прегрешений, / и спаси души наша.

Таже: Ныне отпускаеши: Трисвятое. По Отче наш:

Тропарь воскресен, глас 7:

Разрушил еси Крестом Твоим смерть, / отверзл еси разбойнику рай: / мученикам плач преложил еси, / и апостолом проповедати повелел еси: / яко воскресл еси, Христе Боже, / даруй ми миру велию милость.

Богородичен:

Яко нашего Воскресения сокровище, / на Тя надеющихся, Всепетая, / от рова и глубины прегрешений возведи: / Ты бо повинная греху спасла еси, рождши спасение наше: / яже прежде Рождества Дева, / и в Рождестве Дева, и по Рождестве паки пребываеши Дева.

И отпуст.